

明譯天文書

中

天文書目錄

第二類凡十二門。斷說世事吉凶。

第一門。揔論題目。

第二門。論上下等第應驗。

第三門。說災禍征戰之事。

第四門。說天災疾病。

第五門。說天時寒熱風雨。

第六門。說陰雨濕潤。

第七門。說天地顯象之事。

第八門。斷說天象。

第九門。說物價貴賤。

第十門。說日月交食。

第十一門。說土木二星同度相纏。

第十二門。說世運。

天文書第二類

第一門 揔論題目


凡七曜見吉凶。皆應於人間。若各星廟旺升降。或在本宮。或在分定度數。或在三合。或順或逆。一切皆應驗於人。若在廟旺本宮。主其人高貴。若在降宮。則其人低微。若在升宮。主其人發達。遇吉星必吉。凶星必凶。若星順行。主諸事順遂。若星逆行。則凡事顛倒不遂意。一切星象皆照。

此例推之。蓋天上白羊等四十八象。每一象。地下必有一物象應之。地下之象。應上象之吉凶。凡交新年。必有安年命之理。太陽交白羊宮初秒。看此時東方。是何宮度出地平環上。將此宮度。便作安年命度數。若安年命在定宮。一年禍福。皆依此宮分斷之。定宮者。金牛宮。獅子宮。天蝎宮。寶瓶宮是也。若年命在二體宮。此年禍福。只斷得上半年。候太陽交天稱宮初秒時。又看

是何宮度出地平環上。安下半年之命。却斷下半年禍福。二體宮者。陰陽宮。雙女宮。人馬宮。雙魚宮。是也。若此年安命在轉宮者。則分於四季。初。斷春季禍福。待太陽至巨蠲宮初秒時。看是何宮度出地平環上。即是安夏季之命。太陽至天稱宮初秒。看是何宮度出地平環上。即是安秋季之命。太陽至磨羯宮初秒。看是何宮度出地平環上。即為安冬季之命。每季禍福。皆依安

命宮分斷之。凡一大聖人。或大賢人。出世。即將
本年年命宮為主。斷其吉凶。若看人主之命。不
得知年月日時者。即看入城之時。或登位之時。
是何宮度出地平環上。即安命宮。以斷其終始。
吉凶。若太陰與太陽相會相衝。或在二弦。呼為
四柱。若吉星在太陽光下。或逆行。則減吉。若凶
星在本宮。或在廟旺宮。或在分定度數上。則凶。
不為凶。凡四柱主成全創立之事。顯驗有力。若

四輔柱宮分。則望事欲成。創立顯驗之事。并氣力皆減半。若四弱柱宮分。則凡事蹭蹬不成。全無氣力。



第二門 論上下等第應驗

凡論人間禍福。看本年安命宮。七曜中最旺的星辰為主。將當年禍福。從旺星上斷說。若命宮是定宮者。斷一年之禍福。若命宮是二體宮者。將禍福上下半年斷之。若命宮是轉宮者。將禍福四季斷之。若要知國家一歲之事。其安年命在晝者。看太陽并第十宮。并第十宮主星。若安年命在夜者。看太陰并第十宮。并第十宮主星。

若要知民間一歲之事。看安年命宮。取最旺有力之星。并太陰為主。若論臣宰。并吏人。公使人等。看水星。若論賢德君子之人。看木星。若論有名望故家。并老人。農人。看土星。若論軍官。軍人。軍器。并一切軍務。看火星。若論陰人。樂人。看金星。若論快行人。并使臣。看太陰。已上看各星辰衰旺。斷其人吉凶。若論人身體安寧。看本星得本體之力。若論官貴興旺。看本星得相助之力。

若論福祿并財。看本星無得本體相助之力。若論經商財利。看第二宮。又看第二宮主星。又看福德箭在何宮。并宮主星。已上各星與命宮或命宮主星相照者。各得順受之力。若太陽入白羊宮。或巨蠚宮。或天秤宮。或磨羯宮。初度看此時各星除相衝外。但照廟旺度數者。此季主高貴興旺吉。若福德箭并聰明遠識出衆之箭。其宮主星并三合宮主星在有力吉位。又互相吉。

照者。諸事皆吉。若已上星在無力位分。又與各
星惡照者。諸事皆不吉也。聰明遠識出衆之箭
者。主君王志氣識見方畧。若此箭在吉照旺宮。
則行事聰明皆全。若在凶照弱宮。則行事聰明
不全也。若年命第九遷移宮。有一二星係廟旺。
或三合。或分定度數。則其年人多出外。凡地理
分為七界。每一界分一主星。從南起第一界。是
土星。第二界。是太陽。第三界。是水星。第四界。是

木星第五界。是金星第六界。是太陰第七界。是火星。看其年安命宮在何處。各星中何星有力強旺。則其界人諸事皆吉。若其星無力衰敗。則其界人諸事皆不吉也。凡當年安命在何宮何度。看命前宮分有何吉凶雜星。從安命度上數起。依太陽所行中道。每一日五十九分八秒。看幾日。到前項雜星上。吉星則諸事皆吉。凶星則諸事不吉。應在其時。假若安年命在獅子宮第

十度。有一吉雜星。在雙女宮第十二度。相離安命處三十二度。從命度數起。三十二日有零。至其處。當有吉應。餘同此例。又看當年七曜。在命前後何宮何度。亦從安命處數起。該幾日到其星處。即應其星吉凶。如木星。則應賢德君子。土星。則應農人老人之類。若看君王登位時。東方是何宮分度數。出地平環上。將此作命宮。又看命宮度數。并主星并太陽太陰。在何宮分。又看

命宮出地幾度對黃道的赤道度數幾度看命宮前有何吉雜星及看吉星出地幾度對黃道的赤道度數幾度其命宮赤道度數與雜星赤道度數多寡不同將多者配少者之數餘剩幾度一度准一年該幾年至吉星之度則其年大興旺也若此星係雜星內第一等第二等吉星者主開拓疆宇為福甚大若雜星係凶星者則心神不寧又多憂慮事不如意也若安年命宮

數至小限。在何宮分。看此宮分有何星。假如此
宮分有土星。則年尊位高者有災。若有木星。則
臣宰賢德。有學之人災。若有火星。則軍官軍人
災。若有金星。則陰人災。若有水星。則吏人災。若
有太陰。則陰貴人災。